

# Statut

## Förderverein för dat Plattdüütsch-Zentrum, Landesdeel Sleswig

---

Förderverein Niederdeutsches Regionalzentrum (NRZ) – Landesteil Schleswig e.V.

### 1. DAT ALLGEMEENE

#### § 1 - Naam un Sitt, Geschäftsjohr

De Vereen heet: „Förderverein för dat Plattdüütsch-Zentrum, Landesdeel Sleswig“. De Sitt vun de Vereen is in Leck. He is indragen in dat Vereensregister in Niebüll. Geschäftsjohr is dat Kalennerjohr.

#### § 2 - Sinn vun de Vereen

(1) In dat Johr 1993 wurr in Leck en Plattdüütsch-Zentrum för de Landesdeel Sleswig inrichted, dormit de plattdüütsche Spraak un dat plattdüütsche Wesen un Bruukdoom fördert un an 't Leven holen warrt. Bi all dat, wat Verenen un Lüüd för de Pleeg vun unse plattdüütsche Spraak un Kultur doon, schall holpen un koordineert un schölen Tipps geven warrn.

(2) Dreger vun dat Plattdüütsch-Zentrum is dat Land Sleswig-Holsteen.

(3) De Förderverein schall dat Plattdüütsch-Zentrum bi sien Arbeit mit Vörslääg un mit Geld bistahn. De Vereen is an keen politische Partei bunnen.

(4) De Sinn vun de Statut kann ok dordörch ümsett warrn, dat de Akschonen vun Institutschonen, Verenen, Gruppen un Initiativen för de Pleeg vun de plattdüütsche Spraak direkt fördert warrn.

#### § 3 - Nutzen för de Allgemeenheit

De Vereen maakt allens sülvstlos. He geiht nich toerst en Sinn na, de blots för de egene Weertschop helpen deit. De Vereen arbeitend blots un direkt för de Vördeel vun de Allgemeenheit un na de Regeln in de Afsnitt „steuerbegünstigte Zwecke der Abgabenordnung“.

De Middel vun de Vereen dörven blots för Opgaven bruukt warrn, wo de Statut Verlööf för giff. Keen een dörf en Vördeel hebben dörch Utgaven, de nich na de Sinn von de Vereen sünd, un jeder dörf för sien Arbeit nich mehr kriegen as em tosteiht.

#### § 4 - Liddmaten

Jede natürliche un juristische Person dörf Liddmaat warrn. Een stellt en schriftliche Andrag mit 'n Bitrittsverkloren un warrt vun de Vörstand opnahmen. De Tiet as Liddmaat hett sien Enn, wenn een storven is, sik losseggt, utsloten warrt oder de Vereen sik oplöst.

Een kann sik blots to 'n Johrsenn vun de Vereen losseggen. Wer sik losseggen will, mutt dat op 't Lateste söss Weken vör 't Enn vun en Kalennerjohr an de Vörstand schrieven. En Liddmaatschop kann verseggt un/oder en Liddmaat kann utsloten warrn, wenn he dat Ansehn vun de Vereen schaden un/oder he de in § 2 fastleggte Opgav nich tostimmen oder dorgegen arbeiden deit.

De Vörstand entscheedt, wenn een nich opnahmen warrt, över en Utsluss entscheedt de Liddmatenversammeln mit 2/3-Mehrheit vun de Deelnemers. Wer nich opnahmen oder utsloten warrt, hett dat Recht op Inspraak, un ok doröver entscheedt de Liddmatenversammeln mit 2/3-Mehrheit vun de Deelnemers.

### 2. OPBU UN ORGANISATSCHOON, FINANZERUNG

#### § 5 - Organe

Organe vun de Vereen sünd de Liddmatenversammeln un de Vörstand.

#### § 6 - Liddmatenversammeln

(1) De Liddmaten kamen tominnst eenmal in 't Johr tosamen. Tominnst dree Weken vörher laadt de Vörstand de Versammeln schriftlich in un künnigt dorbi an, wat verhandelt warrn schall. En uteronliche Versammeln mutt binnen 14 Daag inropen warrn, wenn 1/4 vun all Liddmaten dat schriftlich von de Vörstand verlangen doon. In de Liddmatenversammeln hett jede Liddmaat een Stimm. Man dörf sik nich gegensiedig vertreten.

(2) To de Opgaven vun de Liddmatenversammeln höörn:

- Tostimmen to de Daagsornen un to dat Protokoll vun de letzte Liddmatenversammeln
- Wahl vun de Vörstand
- Wahl vun twee Kassenprüfers för en Amtstied vun je twee Johr
- Johrsbericht, Johrsreken un de Bericht vun de Kassenprüfers annehmen
- Entlasten vun de Vörstand
- Fastsetten vun de Liddmatenbidräg
- Ännern vun de Statut
- Beroop vun Ehrenliddmaten

# Statut

## Förderverein för dat Plattdüütsch-Zentrum, Landesdeel Sleswig

Förderverein Niederdeutsches Regionalzentrum (NRZ) – Landesteil Schleswig e.V.

- Oplösen vun de Vereen
- Besluten över Förderrichtlinien vun de Vereen

(3) En Liddmatenversammeln kann besluten, wenn se ornlich inberopen wurrn is.

(4) Wahlen warrn in de Regel schriftlich dörchföhrt oder wenn all, de dat Wahlrecht hebben, sik eenig sünd, open dörch Handteeken. Wer mehr as de Halve vun de afgeven Stimmen kriggt, is wählt. Kriggt keen vun de Lüüd, de to Wahl stahn, mehr as de Halve vun de afgeven Stimmen, denn mutt twischen de beiden Lüüd mit de mehrsten Stimmen noch mal wählt warrn. Kriggt jeder vun beiden glik veel Stimmen, denn gelt dat Loos, wat vun de Vörsitter trocken warrt.

(5) Andrääg to de Daagsornen möten op 't Lateste een Week vör de Versammeln schriftlich bi de Vörstand afgeven sien. Wenn Andrääg för 't Ännern vun de Statut later stellt warrn, so warrn se nich behandelt, anner Andrääg warrn blots behandelt, wenn tominnst 2/3 vun de Liddmaten tostimmen, de dor sünd. Schall de Statut ännert warrn, möten 3/4 vun de Liddmaten tostimmen, de dor sünd. Över de Liddmatenversammeln mutt en Protokoll maakt warrn, un dat mutt vun de Protokollschriever un de Vörsitter ünnerschreven warrn.

### § 7 - Vörstand

(1) To de Vörstand hören

- a) de Vörsitter
- b) de Stellvertreder vun de Vörsitter
- c) de Schriever
- d) de Kassenbaas
- e) bet to söven Bisitter

(2) To de Vörstand schölen Börgerlüüd ut de dree Kreise un de Stadt Flensburg hören.

(3) De Vörstand giff sik en Geschäftsornen. Opgaven vun de Vörstand sünd

- allens umsetzen, wat de Vereen anstrevt
- lopende Arbeit afhanneln, as dat in de Geschäftsornen vorschreven is
- Johrsbericht un Johrsreken vörleggen
- allens utföhren, wat de Liddmatenversammeln besloten hett

(4) De Vörstandsliddmaten -a bit d- sünd de Vörstand in de Sinn vun § 26 BGB. Rechtsverbindliche Bescheden warrn vun de Vörsitter oder sien Stellvertreder un een wiedere Vörstandsliddmaat -a bit d- afgeven.

(5) De Vörstandsliddmaten warrn op de Duer vun dree Jahr wählt. Wedderwahl is mööglich. De Vörstand schall tominnst veermol in 't Kalennerjahr inberopen warrn. De Inladen mutt veerteihn Daag vör de Versammeln toschickt warrn. De Vörstand mutt binnen een Week inlaadt warrn, wenn tominnst dree Vörstandsliddmaten dat verlangen doon.

(6) De Vörstand faat sien Beslutens mit de eenfache Mehrheit vun de Liddmaten, de dor sünd. Över de Beslutens mutt en Protokoll maakt warrn, un dat mutt vun de Schriever un de Vörsitter ünnerschreven warrn.

(7) De Baas vun dat Plattdüütsch-Zentrum för de Landesdeel Sleswig nimmt an jede Vörstandsitten deel un steiht mit sien Rat to Siet.

### § 8 - Finanzen

De Liddmaten vun de Vereen betahlen en Johrsbidrag. De Hööchde vun de Bidrag warrt vun de Liddmatenversammeln fastleggt. För juristische Personen is de Bidrag höger as för natürlige Personen. Bitto bemöht sik de Vereen um Spennen un Toschüss.

## 3. SLUSSREGELN

### § 9 - Oplösen vun de Vereen

(1) De Vereen dörf bloot vun de Liddmatenversammeln oplöst warrn, wenn se ornlich inberopen un de Punkt „Oplösen vun de Vereen“ op de Daagsornen angeven wurrn is. För dat Oplösen möten tominnst 3/4 vun de Liddmaten stimmen, de dor sünd.

(2) Warrt de Vereen oplöst, so fallt dat Vermögen an dat Plattdüütsch-Zentrum för de Landesdeel Sleswig. Wenn dat Plattdüütsch-Zentrum vordem ingahn is, fallt dat Vermögen an en annere plattdüütsche Kulturreger in de Landesdeel Sleswig, wo de Arbeit as Nutzen för de Allgemeinheit gellen deit.

Disse Statut gelt af de 06.09.2013.